

Headline	Ibu bapa terharu dengan usaha TNB		
MediaTitle	Sinar Harian		
Date	18 Feb 2018	Language	Malay
Circulation	160,000	Readership	509,000
Section	Nasional	Page No	3
ArticleSize	239 cm ²	Journalist	N/A
PR Value	RM 12,231		



Ibu bapa terharu dengan usaha TNB

KOTA BELUD - Ibu bapa kepada penerima bantuan program Back To School meluahkan rasa terharu di atas keprihatinan ditunjukkan oleh Tenaga Nasional Berhad (TNB) bagi membantu mengurangkan beban ditanggung mereka.

Seorang suri rumah, Macqueen Vincent, 34, berkata, mereka sekeluarga amat bersyukur dengan pemberian bantuan ini memandangkan suaminya hanya melakukan pekerjaan kampung bagi mendapatkan sumber pendapatan harian.

"Dengan pendapatan kecil itu, kami perlu membeli keperluan harian dan bayangkan macam mana kami hendak sempurnakan kelengkapan persekolahan anak-anak.

"Sebab itu saya rasa sangat ter-

haru dan gembira dengan bantuan oleh TNB ini yang sedikit sebanyak dapat membantu anak saya untuk memiliki kelengkapan persekolahan yang sempurna,"katanya kepada Sinar Harian.

Di samping itu, menurut seorang nelayan, Adran Kuyuh, 40, sebelum ini pihaknya amat sukar untuk menyediakan kelengkapan sekolah buat anak-anaknya berikutan hanya memperoleh gaji sekitar RM500 sebulan.

Menurutnya, dengan gaji itu, dia perlu membeli kelengkapan harian di samping menyediakan keperluan buat empat orang anaknya yang masih bersekolah.

"Bila anak saya dipilih untuk terima bantuan ini, ia amat membantu

dalam mengurangkan beban saya memandangkan sumber pendapatan kami tidak menentu,"katanya.

Dalam pada itu, Lily Dualis, 53, berkata, pihaknya amat berterima kasih kepada TNB di atas usaha pihak berkenaan dalam membantu mengurangkan beban ditanggung oleh penduduk di kawasan luar bandar yang kurang berkemampuan.

Menurutnya, usaha ini perlu diteruskan selepas ini supaya setiap murid yang kurang berkemampuan dapat menikmati alam persekolahan dengan keadaan serba lengkap.

"Saya harap program ini dapat diteruskan lagi khususnya di sekolah-sekolah daif yang memerlukan,"katanya.